

# GJALDSKRÁ

## Hitaveitu Húnaþings vestra.

### I. KAFLI

#### 1. gr.

Hitaveita Húnaþings vestra selur afnot hitaorku úr hitaveitukerfum þeim, sem gerð hafa verið eða kunna að verða gerð í lögsagnarumdæmi Sveitarfélagsins Húnaþings vestra og hún hefur umráðarétt yfir eftir þeim reglum, sem settar eru í gjaldskrá þessari, sbr. reglugerð staðfesta af iðnaðarráðherra fyrir Hitaveitu Húnaþings vestra.

#### 2. gr.

Hitaveita Húnaþings vestra lætur hverju húsi, sem er í sambandi við vatnsæðar hennar í té vatnsmagn, er ætla má að nægi til hitunar á húsinu. Hitaveitan lætur setja rennismæli eða stillanlegan hemil fyrir hámarksrennsli til hvers upphitunarkerfis og miðast gjald hitaveitunnar fyrir selda orku við rúmmetra samkvæmt rennismælinum eða það hámark, sem hemillinn er stilltur á. Hitaveitan ræður gerð rennismæla og hemla og sér um viðhald og endurnýjun þeirra.

#### 3. gr.

Einungis starfsmenn hitaveitunnar mega breyta stillingu innsiglaðra tengihluta. Hitaveitan breytir stillingu hemils eftir óskum húseiganda fyrsta árið, sem hús hans er tengt við hitaveitukerfið, en síðan verður hemilsstillingu að jafnaði breytt einu sinni á ári og skal skrifleg beiðni um breytingu koma fram við hitaveituna fyrir 1. september ár hvert. Hámarksstilling hemils gildir allt árið þótt vatnsnotkun verði minni hluta úr ári. Minnsta sala gegnum hemil skal vera 1 mínútulítri. Selt vatnsmagn standi ávallt á heilum eða hálfum mínútulítra.

Ef kaupandi óskar að hemill eða mælir sé prófaður skal hann senda skriflega beiðni þar um til hitaveitunnar. Komi í ljós við þá athugun að frávik sé 5% eða minna, er heimilt að gera kaupanda að greiða álestrargjald. Sé frávik meira skal hitaveitan greiða kostnað við prófunina og leiðréttá reikning kaupanda í samræmi við niðurstöður hennar, þó ekki fyrir lengra tímabil en tvo mánuði nema kaupandi eða Hitaveita Húnaþings vestra, eftir því sem við á, geti sannað að um lengra tímabil hafi verið að ræða, þó lengst fjögur ár.

### II. KAFLI

#### 4. gr.

Hitaveita Húnaþings vestra rekur 3 aðskilin hitaveitusvæði og dreifikerfi með vatni sem hefur mismunandi hita eftir svæðum. Þessi svæði eru á Hvammstanga við Miðfjörð, á Laugarbakka í Miðfirði og á Reykjatanga við Hrútafjörð. Gjald fyrir eininguna af heitu vatni ( $m^3$  eða  $l/mín$ ) verður því mishátt eftir svæðum. Fast gjald hjá þeim notendum sem kaupa heitt vatn eftir hemli skal vera krónur 647 á mánuði. Gjöld fyrir afnot af heita vatninu er sem hér segir Hvammstangaveita vatnsgjald kr. 1.294 á mánuði fyrir hvern mínútulítra í hámarksstillingu hemils, Laugarbakkaveita og Reykjatangaveita kr. 653 á mánuði fyrir hvern mínútulítra í hámarksstillingu hemils.

## III. KAFLI

## 5. gr.

Heimæðargjald Hitaveitu Húnaþings vestra skal vera sem hér segir fyrir eina heimæð:

Rúmmál húss (utanmál)	Heimæðargjald	
Allt að 400-2.000 m <sup>3</sup>	kr. 120.637 fyrir allt að	400 m <sup>3</sup> og 93 kr./pr. m <sup>3</sup> þar yfir
2.000-6.000 m <sup>3</sup>	kr. 273.312 fyrir	2.000 m <sup>3</sup> og 85 kr./pr. m <sup>3</sup> þar yfir
6.000-10.000 m <sup>3</sup>	kr. 606.601 fyrir	6.000 m <sup>3</sup> og 81 kr./pr. m <sup>3</sup> þar yfir
10.000 m <sup>3</sup>	kr. 913.303 fyrir	10.000 m <sup>3</sup> og 58 kr./pr. m <sup>3</sup> þar yfir

Stofngjald fyrir hvern aðrennismæli umfram einn á sama inntak er kr. 33.645.

Sé um óskipulagt svæði að ræða, eða aðstæður óvenjulegar, er heimilt að krefjast sérstaks aukagjalds af húsráðanda eða gera honum að greiða fyrir heimtaugina samkvæmt kostnaði, en gera skal honum aðvart um það fyrirfram.

## 6. gr.

Heimæðargjöld samkvæmt gjaldskrá þessari eru miðuð við vísitölu byggingarkostnaðar 1. janúar 2003, 278 stig. Hitaveitunni er heimilt að breyta heimæðagjöldum þessum í samræmi við breytingu á nefndri vísitölu.

## IV. KAFLI

## 7. gr.

Samkvæmt ákvæðum í 2. gr. er heimilt að selja heitt vatn til einstakra notenda um rúm-metramæli. Hitaveitan setur upp slíka mæla og sér um viðhald og endurnýjun þeirra. Hjá notendum er kaupa vatn samkvæmt rúmmetramæli er heimilt að innheimta mælaleigu.

Gjald fyrir hvern rúmmetra vatns skal vera;

Hvammstangaveita kr. 60,27

Laugarbakkaveita kr. 37,80

Reykjatangaveita kr. 37,80

Mælaleiga fyrir hvern mánuð skal vera kr. 647 pr. mæli.

## 8. gr.

Öll gjöld skv. gjaldskrá þessari má taka fjárnámi á kostnað gjaldanda skv. 79. gr. laga nr. 58/1967, með síðari breytingum.

## 9. gr.

Hitaveita Húnaþings vestra hefur rétt til að loka aðrennsli heita vatnsins að húsi eða íbúð notanda, sem vanrækir að greiða hitaveitugjöld. Fyrirætlun um lokun ber að tilkynna með fimm daga fyrirvara.

Allan kostnað við lokun og opnun á ný greiðir sá, sem í vanskilum er. Gjaldið skal vera það sama og mánaðarleiga á mæli skv. 8. gr. gjaldskrár þessarar í hvert skipti og gjald fyrir aukaálestur skal vera það sama og mánaðarleiga á mæli skv. 8. gr. þessarar gjaldskrár.

Eftirlitsmanni Hitaveitu Húnaþings vestra skal, hvenær sem er, frjáls aðgangur að öllum hitakerfum, sem tengd eru við hitaveituna. Er húseiganda skylt að hlíta tafarlaust fyrirmælum hans um viðgerð á bilunum og sérhverjum ráðstöfunum til varnar gegn misnotkun á heita vatninu.

Við gjaldskrána bætist virðisaukaskattur eins og hann er samkvæmt lögum á hverjum tíma.

Gjaldskrá þessi, sem samþykkt er af sveitarstjórn Húnaþings vestra þann 30. janúar 2003 staðfestist hér með samkvæmt orkulögum nr. 57/1967, með síðari breytingum, til að taka gildi við birtingu og birtist til eftirbreytni öllum sem hlut eiga að máli. Jafnframt er úr gildi felld gjaldskrá Hitaveitu Húnaþings vestra nr. 68, 18. janúar 2001.

*Iðnaðarráðuneytinu, 1. október 2003.*

**Valgerður Sverrisdóttir.**

---

*Kristján Skarphéðinsson.*